

Kuketi Miguuni pa Yesu

Lakini kinatakiwa kitu kimoja tu; na Mariamu amelichagua fungu lililo jema, ambalo hataondolewa.—**Luka 10:42.**

Mwokozi wetu alithamini nyumba tulivu na wasikilizaji wenye shauku. Alitamani upole, ukarimu na upendo wa kibinadamu. Wale ambao walipokea mafundisho ya mbinguni ambayo alikuwa tayari kuyatoa walibarikiwa sana. Watu walipokuwa wakimfuata Kristo katika maeneo ya wazi, aliwafunulia uzuri wa ulimwengu wa asili. Alitafuta kuwafumbua macho yao ya ufahamu ili waweze kuona jinsi mkono wa Mungu unavyoshikilia ulimwengu.... Lakini wengi walikuwa wazito kusikia, na nyumbani huko Bethania, Kristo alipata pumziko kutokana na mapambano ya kuchosha ya maisha ya umma. Hapa aliwafungulia wingi wa majaliwa ya Mungu watu walioyathamini. Katika mahojiano haya ya faragha, aliwafunulia wasikilizaji Wake yale ambayo hakudiriki kuyasema katika umati mchanganyiko. Hapa hapakuwa na haja ya kusema kwa mifano na rafiki zake.

Yesu alipokuwa akitoa mafundisho Yake ya ajabu, Mariamu alikuwa akipenda kukaa miguuni pake msikilizaji mwenye kicho na bidii. Wakati fulani Martha alipokuwa akihangaika na maandalizi ya chakula, alimwendea Yesu na kumwambia, "Bwana, huoni vibaya hivyo ndugu yangu alivyoniacha nitumike peke yangu? Basi mwambie anisaidie." Hii ilikuwa ni mara ya kwanza Kristo alipokwenda Bethania. Mwokozi na wanafunzi wake walikuwa wamesafiri safari ya kuchosha kwa miguu kutoka Yeriko. Martha alikuwa na hamu ya kuwaandalia pumziko lao, na katika hamu yake akasahau kumfanyia uungwana kwa sababu ya mgeni wake. Yesu alijibu akasema: "Martha, Martha, unajisumbua na mambo mengi, lakini kuna haja ya kitu kimoja tu, na Mariamu amechagua fungu lililo jema, ambalo halitaondolewa." Mariamu alikuwa akihifadhi katika akili yake maneno ya thamani yaliyokuwa yanatoka kwenye midomo ya Mwokozi, maneno ambayo yalikuwa ya thamani sana kwake kuliko vito vya thamani zaidi.

"Jambo moja" ambalo Martha alilibitaji lilikuwa ni utulivu, roho ya ibada, shauku ya kina ya kuyajua yale yanayohusiana na wakati ujao, maisha bila kifo, na neema zinazohitajika kwa ajili ya ukuaji wa kiroho. Hakupaswa kuhangaika sana kwa mambo yanayopita, badala yake ahangaikie mambo ya milele. Yesu atawafundisha watoto Wake kutumia kila fursa ya kupata maarifa hayo ambayo yatawafanya wawe na hekima katika wokovu. Kazi ya Kristo inahitaji watendakazi waangalifu na wenye nguvu. Kuna uwanja mpana kwa akina Martha, wenye ari katika shughuli za kidini. Lakini hebu wakae kwanza miguuni pa Yesu pamoja na Mariamu. Hebu bidii, uharaka na nguvu zitakaswe kwa neema ya Kristo; kisha maisha yatakuwa nguvu isiyoshindwa kwa ajili ya mema (Tumaini la Vizazi Vyote. Sehemu ya 2, uk. 134–136).